

De verklaring van de deurwaarder van Philips de Goede: 1449

Aen hoge ende mogende heren, mijn heren van den rade mijns ghenadichs heren shertoghen van Bourgoendië, ghestelt then saken sijre [genaden] landen van Hollant, Zelant ende Vrieslant, residencie houdende in den Hage, Jan van den Cruce, duerweerder van der camer van den rade in Hollant, eere, dienst ende waerdicheit mit alre onderdanicheit.

Hoge ende mogende heren, u ghelieve the weten, dat ick uut machte van sekerer openen mandamenten mijns voirscr. ghenadichs heren, aen die marge van welke dese mijne relacie ghehecht is, ghetogen byn in die Loesdrecht aen den schout ende sommige van den gherechte aldaer, aen hemluden begerende bijstant van twee off drie guede mannen om myt mij the trecken int Sticht tot Broekell, tot Mairsen ende tot Westbroick om aldair the toenen t voirscreven mandament mijns ghenadichs heren ende the volcomen t ynhouden van dien, daer dieselve van der Loesdrecht mij op antwoerden, dat

Sij myt mij nyement seynden en dorsten in die Sticht omme te staen als tuyghen, want sij sorchden, dat men se doot slaen mochte; mer gaven mij mede een knechtken myt eenen parde. Dit aengesien, mogende heren, ende dat die veensaters bij mij alleen quaet the vergaderen gheweest souden hebben, want sij veer vaneen sitten, ende oick enige, die ick sprake, seiden, dat ick trecken sonde in die stat, wantet dien meest anclafft,

Soe byn ic ghereden tot Brueckell aen den cureit, aen hem begerende, dat hij woude hoeren mijnen last ende copie van den mandamente nemen ende dat hijt voert den bueren ende veensaters kondigen sonde, opdat sij daerbij in geenre meerder schade en quamen.

Dair hij op antwoirde, alsdat hem noch den bueren die sake nyet aen en ging, mer dat men gaen sonde aen die ecclesien ende burgeren van Utrecht, ende en woude gheen copie houden,

Voert soe byn ick ghetogen tot Marsen aen den cureit, hem tonende mijn brieven, diewelke seide: doet mytten brieven, wat ghij wilt, ick en wil gheen brieven ontfangen dan van mijnen heere van Utrecht.

Voert, mogende heren, soe byn ick ghetogen bynnen der stadt van Utrecht tot sinte Jacobs aen den cureit aldaer, want die van Westbroick aldaer the kercken behoeren, ende hebben denselven mijnen brieff ghetoent ende mijn boetschap ghedaen,

Dair sij op antwoerden, dat sij gheen copie nemen noch kundigen en wouden, mar dat ick gaen soude in den Doem aen den heren ende thoenen daer mijn brieven, wantet dien meest aenginge ende veel meer dan den bueren.

Ende want ghene van desen cureyten copie en hebben willen nemen omme die the kondigen, soe heb ick aen elcke van desen kerspelkercken die copie van den brieve selve ghespijkt, opdat se een yegelick syen ende lesen mochten. Ende dat dit aldus bij mij gheschiet is, mogende heren, certificere ick u waerachtig wesende. Oirkonde mijnen segel hierop ghedruckt opten achtiesten dach in Augusto int jaer viertienhondert negenendeviertich.

Bron: F.Th. Enklaar ed., *Middeleeuwsche rechtsbronnen van Stad en Lande van Gooiland* (Utrecht 1932) pp. 317v.